

Na osnovu člana 11. i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana __. __. 2021. godine, donijela je

ZAKON O SPORTU

(PREDNACRT)

POGLAVLJE I - OSNOVNE ODREDBE

Član 1.

(Predmet Zakona)

Ovim zakonom se uređuju osnovna načela sporta, organizovanje sportskih aktivnosti i učesnici u sportu, prava i obaveze sportista, stručni kadar, sportski objekti i zdravstveni nadzor, matične evidencije, ostvarivanje javnog interesa Kantona Sarajevo (u daljem tekstu: Kanton), grada Sarajeva (u daljem tekstu: Grad) i općina sa područja Kantona (u daljem tekstu: općina) u sportu i druga pitanja od značaja za sport.

Član 2.

(Primjena Zakona i međunarodnih konvencija)

- (1) Svi građani (djeca, omladina, odrasli i osobe sa invaliditetom) imaju pravo da provode sportske aktivnosti na bazi interesa i dobrovoljnosti u skladu sa odredbama ovog zakona i međunarodnim konvencijama: Evropskom konvencijom o zaštiti ljudskih prava i osnovnih sloboda, Evropskom poveljom o sportu, Konvencijom UN-a o pravima djeteta, Međunarodnom konvencijom protiv dopinga u sportu, Konvencijom o pravima osoba sa invaliditetom, Konvencijom o pravima osoba sa invaliditetom namijenjenoj djeci, Evropskom konvencijom o nasilju i nedoličnom ponašanju gledalaca na sportskim priredbama, Olimpijskom poveljom, Paraolimpijskom poveljom, Evropskim kodeksom o sportskoj etici, Deklaracijom o sportu, toleranciji, Fair Play, pravilima međunarodnih sportskih asocijacija, te Izjavom iz Lozane o organizovanju sporta u Bosni i Hercegovini, kao i konvencijama i drugim međunarodnim multilateralnim i bilateralnim ugovorima kojima pristupi ili koje prihvati Bosna i Hercegovina nakon stupanja na snagu ovog zakona.
- (2) Odredbe ovog zakona odgovarajuće se primjenjuju na osobe sa invaliditetom.

Član 3.

(Osnovni principi organizacije sporta)

- (1) Organizatori i učesnici u sportskim aktivnostima su obavezni da razvijaju duh olimpizma, podstiču fer plej, suzbijaju nasilje, doping i sve vidove nesportskog ponašanja.
- (2) Uz provođenje načela iz stava (1) ovog člana, osnovni principi organizacije sporta u Kantonu Sarajevo su i:
 - a) afirmacija prava i slobode sportista,
 - b) pravo svih građana da se bave sportom pod istim uslovima bez obzira na nacionalnu, vjersku, političku, rasnu, socijalnu i polnu pripadnost,
 - c) ostvarivanje javnog interesa Kantona Sarajevo u sportu, te obaveza Kantona Sarajevo da materijalnim sufinansiranjem i programima razvoja učestvuje u stvaranju opštih i posebnih uslova za sportske aktivnosti, sportsko napredovanje i usavršavanje, materijalne i društvene stimulacije za ostvarivanje vrhunskih sportskih rezultata,

- d) organizovanje efikasnog sistema stručnog osposobljavanja i usavršavanja stručnih kadrova u sportu,
- e) obezbjeđivanje zdravstvene zaštite sportista i spriječavanje upotrebe nedozvoljenih stimulativnih sredstava,
- f) stručnost u radu i podsticanje naučnoistraživačkog rada, primjena savremenih metoda rada, informatike i izdavačke djelatnosti,
- g) afirmacija pravila da se svi sporovi između sportista, sportskih organizacija i organa rješavaju isključivo preko i unutar odgovarajućih sportskih organa i arbitražnih sportskih tijela,
- h) afirmacija autonomnosti sportskih organizacija u pogledu uređivanja unutrašnjih odnosa i udruživanja.

Član 4.

(Sastavni dijelovi sporta)

Sport u smislu ovog zakona obuhvata:

- a) sportske aktivnosti i igre organizovane radi postizanja sportskih dostignuća koja se ostvaruju shodno utvrđenim pravilima (sportska takmičenja i sportske priredbe),
- b) portske aktivnosti i igre organizovane s ciljem unapređenja zdravlja ili rekreacije (sportska rekreacija i sport za sve),
- c) sportske aktivnosti organizovane za osobe sa invaliditetom,
- d) organizovani školski i univerzitetski sport.

Član 5.

(Definicije u sportu)

- (1) Sportski odgoj i obrazovanje u smislu ovog zakona je sportska aktivnost djece i omladine koja se obavlja u nastavno obrazovnom procesu na svim nivoima obrazovanja (predškolsko, osnovno, srednje i visoko) ili izvan nastavno obrazovnog procesa neovisno o obliku pojavljivanja.
- (2) Sport za sve u smislu ovog zakona je organizovana ili samoorganizovana sistematska sportska aktivnost svih građana.
- (3) Razvojni sport u smislu ovog zakona je priprema i takmičenje pojedinaca i ekipa koji su svojim stručnim i organizacijskim mogućnostima prevazišli sport za sve, a nisu ostvarili vrhunski sportski rezultat.
- (4) Vrhunski sport u smislu ovog zakona je priprema i takmičenje pojedinaca i ekipa koji su na najvećim međunarodnim takmičenjima ostvarili vrhunski rezultat.

Član 6.

(Sportske aktivnosti)

Pod sportskim aktivnostima u smislu ovog zakona podrazumijeva se naročito:

- a) priprema za takmičenje (trening),
- b) sudjelovanje u sportskim takmičenjima,
- c) poslovi lica koja obučavaju (pripremaju) sportiste,
- d) poslovi organizovanja i vođenja sportskih priredbi,
- e) poslovi upravljanja sportskim objektima.

POGLAVLJE II – ORGANIZOVANJE SPORTSKIH AKTIVNOSTI

ODJELJAK A. Priprema i sportsko takmičenje

Član 7.

(Pravna i fizička lica u sportu)

- (1) Organizovanje sportskih aktivnosti iz člana 6. tač. a) i b) mogu provoditi sva domaća i strana pravna ili fizička lica kao privrednu ili neprivrednu djelatnost.
- (2) Pravna lica iz prethodnog stava mogu se osnivati u svim oblicima svojine.

ODJELJAK B. Organizacije u sportu

Član 8.

(Klub, sportsko društvo, sportski savez i organizacije za podršku sportu)

- (1) Organizacije u sportu u smislu ovog zakona su: klub, sportsko društvo i udruženje sportskih klubova u pojedinim sportovima - sportski savez, koje se osnivaju u skladu sa odredbama posebnog zakona.
- (2) Organizacije u sportu osnivaju se radi provođenja sportskih aktivnosti iz člana 6. tač. a) – d) ovog Zakona, a finansiraju se u skladu sa odredbama člana 52. stav (1) i (2) i člana 54. i 55. ovog Zakona.
- (3) Klub je osnovna organizacija u sportu koja može obavljati sportsku aktivnost amaterski ili profesionalno, a za organizovanje sportskih aktivnosti iz člana 6. tač. a) i b) ovog zakona, odnosno za stvaranje uslova za učešće i učešću sportista u sportskim takmičenjima utvrđenim pravilima odgovarajućeg sportskog saveza.
- (4) Sportsko društvo je udruženje klubova različitih sportskih grana koji se udružuju radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta. Sportsko društvo je nosilac prava na zajednički naziv i zajedničke simbole, ako osnivačkim aktom nije drugačije određeno.
- (5) Sportski savez je udruženje sportskih klubova u pojedinim sportovima koji se udružuju da bi ostvarili zajedničke interese i ciljeve.
- (6) Organizacije za podršku sportu su javne ustanove i institucije u oblasti sporta. Organizacije za podršku sportu osnivaju se radi provođenja aktivnosti iz člana 6. tačka e) kao i provođenja aktivnosti usavršavanja stručnih kadrova u sportu, naučnom radu, izgradnji, razvoju i održavanju sportskih objekata i opreme, a finansiraju se u skladu sa odredbom člana 52. stav (1) i (3) ovog Zakona.

Član 9.

(Amaterski sportski klub)

- (1) Amaterski sportski klub je dobrovoljna, nevladina, neprofitna organizacija koja se organizuje kao udruženje za obavljanje sportske djelatnosti u skladu sa Zakonom o udruženjima i fondacijama Bosne i Hercegovine, Zakonom o udruženjima i fondacijama Federacije Bosne i Hercegovine, Zakonom o sportu u Bosni i Hercegovini, ovim zakonom i drugim važećim zakonima i propisima kojim se uređuje rad udruženja u sportu.
- (2) Amaterski sportski klub mogu osnovati najmanje tri fizička lica ili pravno lice.

Član 10.

(Profesionalni sportski klub)

- (1) Profesionalni sportski klub osniva se kao privredno društvo s ciljem obavljanja sportske djelatnosti.

- (2) Profesionalni sportski klub osniva se i registruje kao poslovni subjekat kod nadležnog suda u skladu sa Okvirnim zakonom o registraciji poslovnih subjekata u Bosni i Hercegovini i odgovarajućim Zakonom Federacije Bosne i Hercegovine kojim se uređuje osnivanje poslovnih subjekata, Zakonom o sportu u Bosni i Hercegovini, ovim zakonom, kao i statutima sportskih saveza.

Član 11.

(Udruživanje organizacija u sportu)

- (1) Klubovi mogu osnivati ili udruživati se u odgovarajuće saveze i sportska društva na području Kantona.
- (2) Sportski savezi Kantona u određenom sportu mogu se udruživati u sportske saveze određenog sporta na nivou Federacije Bosne i Hercegovine, odnosno u sportske saveze određenog sporta na nivou Bosne i Hercegovine.
- (3) Udruživanje u saveze vrši se ugovorom kojim se uređuju međusobna prava i obaveze.
- (4) Za jedan sport na nivou Kantona Sarajevo može se osnovati samo jedan sportski savez.

Član 12.

(Organizacije u sportu osoba sa invaliditetom)

- (1) Radi organizovanja sportsko-rekreativne aktivnosti i sportskih takmičenja osoba sa invaliditetom, osnivaju se sportski klubovi osoba sa invaliditetom.
- (2) Sportski klub osoba sa invaliditetom može obavljati sportsku aktivnost amaterski ili profesionalno.
- (3) Sportski klubovi iz stava (1) ovog člana mogu se udruživati u sportske saveze Kantona Sarajevo, Federacije Bosne i Hercegovine i Bosne i Hercegovine, a mogu se udruživati i u sportska društva osoba sa invaliditetom.
- (4) Sportski savezi osoba sa invaliditetom usklađuju se i koordiniraju aktivnosti klubova, organizuju takmičenja i uređuju sva ostala pitanja koja se odnose na sport osoba sa invaliditetom u određenom sportu.
- (5) Sportski savezi osoba sa invaliditetom registruju se kao udruženja.

Član 13.

(Amaterski sportski klub osoba sa invaliditetom)

Amaterski sportski klub osoba sa invaliditetom je dobrovoljna nevladina neprofitna organizacija koja se organizuje kao udruženje građana za obavljanje sportske djelatnosti u skladu sa Zakonom o udruženjima i fondacijama Bosne i Hercegovine, Zakonom o udruženjima i fondacijama Federacije Bosne i Hercegovine, Zakonom o sportu u Bosni i Hercegovini, ovim zakonom i drugim propisima iz oblasti sporta.

Član 14.

(Profesionalni sportski klub osoba sa invaliditetom)

- (1) Profesionalni sportski klub osoba sa invaliditetom osniva se kao privredno društvo, odnosno preduzeće s ciljem obavljanja sportske djelatnosti.
- (2) Profesionalni sportski klub osoba sa invaliditetom osniva se i registruje kao poslovni subjekat u skladu sa Okvirnim zakonom o registraciji poslovnih subjekata u Bosni i Hercegovini, Zakonom o privrednim društvima u Federaciji Bosne i Hercegovine kojim se uređuje osnivanje poslovnih subjekata, Zakonom o sportu u Bosni i Hercegovini, ovim zakonom, kao i statutima sportskih saveza.

Član 15.

(Sportska društva osoba sa invaliditetom)

- (1) Sportski klubovi osoba sa invaliditetom mogu se udruživati u sportska društva osoba sa invaliditetom radi uređivanja i ostvarivanja zajedničkih ciljeva i interesa, kao i zajedničkognastupanja u oblasti sporta.
- (2) Sportski klubovi osoba sa invaliditetom udruženi u sportsko društvo osoba sa invaliditetom regulišu međusobne odnose i prava osnivačkim aktom i drugim aktima sportskog društvaosoba sa invaliditetom.
- (3) Sportsko društvo osoba sa invaliditetom je nosilac prava na zajednički naziv i zajedničke simbole, ako osnivačkim i drugimaktima nije drugačije određeno.
- (4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi s radom sportskih društava osoba sa invaliditetom dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

Član 16.

(Sportski savez osoba sa invaliditetom)

- (1) Sportski savez osoba sa invaliditetom organizuje se na nivou Kantona Sarajevo.
- (2) Za jedan sport na nivou Kantona Sarajevo može se osnovati samo jedan sportski savez osoba sa invaliditetom.
- (3) Sportski savez osoba sa invaliditetom Kantona Sarajevo osniva se u skladu sa ovim zakonom i Zakonom o udruženjima i fondacijama Federacije Bosne i Hercegovine, na osnovu odluka sportskih saveza za osobe sa invaliditetom o dobrovoljnom udruživanju, a u slučaju spora između sportskih saveza, odluku o tome donosi Vlada Kantona na usaglašen prijedlog Ministarstva kulture i sporta i Ministarstva pravde Kantona Sarajevo.
- (4) Sjedište sportskih saveza pojedinog sporta za osobe sa invaliditetom Kantona Sarajevo određuje se na osnovu razvijenosti sporta, tradicije, masovnosti i kvaliteta određene sportske grane.

Član 17.

(Nadležnosti sportskih saveza osoba sa invaliditetom Kantona Sarajevo)

Sportski savezi osoba sa invaliditetom Kantona Sarajevo nadležni su za:

- a) organizovanje i provođenje sistema takmičenja,
- b) zastupanje i predstavljanje sporta za osobe sa invaliditetom u federalnim, državnim, regionalnim i međunarodnim sportskim organizacijama,
- c) pripremanje i nastupanje klubova i državnih reprezentacija na zvaničnim međunarodnim takmičenjima,
- d) utvrđivanje programa razvoja u skladu sa Strategijom Kantona u sportu,
- e) saradnju sa nadležnim sportskim i drugim organima Kantona, Federacije BiH i Bosne i Hercegovine.

Član 18.

(Uslovi za organizovanje sportskih aktivnosti)

Organizovanje sportskih aktivnosti iz člana 6. tač a) i b) može provoditi organizacija u sportu pod uslovom da obezbijedi odgovarajući stručni kadar, sportski objekat, planiranje i evidenciju stručnog rada, vođenja matičnih evidencija, zdravstveni nadzor i održavanje reda za vrijeme takmičenja.

ODJELJAK C. Privredna društva u sportu

Član 19.

(Privredna društva u sportu)

- (1) Za provođenje sportskih aktivnosti iz člana 6. tač. a) i b) ovog zakona domaće i strano, pravno i fizičko lice može osnovati privredno društvo u skladu sa zakonom kojim se uređuje rad privrednih društava.
- (2) Odnosi između osnivača i privrednog društva iz prethodnog stava uređuju se ugovorom, u skladu sa aktom o osnivanju.

ODJELJAK D. Ustanove u sportu

Član 20.

(Osnivači ustanova)

- (1) Kanton, Grad i općina može osnovati javnu ustanovu u državnoj svojini za provođenje poslova iz člana 48. ovog zakona.
- (2) Domaće i strano pravno i fizičko lice može osnovati ustanovu za provođenje poslova iz prethodnog stava.
- (3) Ustanove iz st. (1) i (2) ovog člana mogu se osnovati pod uslovima utvrđenim posebnim zakonom.

Član 21.

(Uslovi za imenovanje direktora javne ustanove u sportu)

- (1) Za direktora javne ustanove u sportu može biti imenovano lice koje, pored opštih uslova za zasnivanje radnog odnosa, ima visoku stručnu spremu i tri godine radnog iskustva u sportu.
- (2) Direktora javne ustanove u sportu imenuje upravni odbor na osnovu javnog konkursa na period od četiri godine, uz saglasnost osnivača.
- (3) Direktor ustanove u sportu imenuje se na četiri godine u skladu sa zakonom kojim se uređuje rad ustanova.

ODJELJAK E. Sportske priredbe

Član 22.

(Međunarodna sportska takmičenja i priredbe)

Na području Kantona Sarajevo mogu se organizovati međunarodna sportska takmičenja i priredbe:

- a) olimpijske i paraolimpijske igre,
- b) svjetska i evropska prvenstva,
- c) univerzijade,
- d) mediteranske igre,
- e) svjetski kupovi i završni turniri evropske i svjetske lige,
- f) zimski i ljetni olimpijski festival mladih Evrope,
- g) balkanska i druga regionalna prvenstva,
- h) kriterijumski i kvalifikacioni međunarodni sportski turniri,
- i) tradicionalne međunarodne sportske manifestacije koje su u kalendaru međunarodnih sportskih asocijacija.

Član 23.

(Uslovi za organizovanje velikih međunarodnih sportskih priredbi)

- (1) Organizacije u sportu koje se kandiduju za organizovanje velikih međunarodnih sportskih

priredbi, na području Kantona Sarajevo moraju:

- a) dobiti prethodnu saglasnost Ministarstva civilnih poslova Bosne i Hercegovine i Ministarstva kulture i sporta Federacije Bosne i Hercegovine,
 - b) obezbijediti uslove koji su predviđeni pravilima međunarodnih sportskih asocijacija,
 - c) dobiti prethodnu saglasnost Skupštine Kantona Sarajevo (u daljem tekstu: Skupštine Kantona) na prijedlog Vlade Kantona Sarajevo (u daljem tekstu: Vlade Kantona) za podnošenje kandidature kod odgovarajućeg međunarodnog sportskog saveza,
 - d) dobiti saglasnost odgovarajućeg sportskog saveza na državnom nivou ili Olimpijskog komiteta Bosne i Hercegovine,
 - e) utvrditi inicijativno tijelo za cjelokupnu pripremu kandidature,
 - f) izraditi i predložiti Ministarstvu elaborat o organizovanju i finansiranju sportske priredbe.
- (2) Obaveze iz prethodnog stava odnose se na sve velike sportske priredbe, čak i ako je organizator sam obezbijedio sredstva.
 - (3) Bliže uslove za organizovanje sportskih priredbi na području Kantona Sarajevo uređuje ministar nadležan za sport (u daljem tekstu: Ministar).
 - (4) Kada se Grad ili općina kandiduje za organizovanje neke od velikih međunarodnih priredbi iz člana 22. ovog zakona, a za njenu organizaciju potražuje sredstva iz kantonalnog budžeta, u prilogu zahtjeva za davanje prethodne saglasnosti Skupštine Kantona obavezno dostalja dokaze o ispunjavanju uslova iz tač. a) do d) stava (1) ovog člana.

Član 24.

(Sistem sportskih takmičenja)

- (1) Sistem sportskih takmičenja utvrđuje se opštim aktom odgovarajućeg sportskog saveza, u skladu sa oblikom sportskih takmičenja na državnim, evropskim i svjetskim prvenstvima ili olimpijskim igrama.
- (2) U sistemu sportskih takmičenja učestvuju klubovi u okviru odgovarajućeg sportskog saveza, pod uslovima i na način utvrđen općim aktom tog saveza.
- (3) Klubovi, sportisti i svi drugi učesnici sportskih aktivnosti dužni su da saraduju sa organizatorom i ne smiju svojim postupcima izazivati ili doprinostiti nasilju ili nedoličnom ponašanju gledalaca.

POGLAVLJE III – SPORTISTI

Član 25.

(Prava i obaveze sportista)

- (1) Sportista u smislu ovog Zakona je osoba koja se priprema i učestvuje u organizovanim sportskim takmičenjima.
- (2) Sportista ima sva građanska prava utvrđena Ustavom i zakonima Bosne i Hercegovine, entitetskim ustavima i zakonima, zakonima i drugim propisima na drugim nivoima administrativnog organizovanja, kao i odredbama ovog Zakona, Zakona o sportu u BiH i entitetskim zakonima o sportu.
- (3) Sportista može da se bavi sportskim aktivnostima amaterski ili profesionalno.
- (4) Sportista iz prethodnog stava, zavisno od rezultata koje postiže, kategoriše se u svjetsku A ili B klasu, internacionalnu A ili B klasu, perspektivnu A ili B i nacionalnu A ili B klasu. Zaslužnim sportistom sa teritorije Kantona smatra se sportista koji je kategorisan u svjetsku A klasu. Vrhunskim sportistom sa teritorije Kantona smatra se sportista koji je kategorisan u svjetsku B klasu ili internacionalnu A klasu.
- (5) Ministar donosi pravilnik o kategorizaciji zaslužnih, vrhunskih i ostalih sportista prema ostvarenim rezultatima. O posebnim javnim nagradama i priznanjima zaslužnim sportistima odlučuje Skupština Kantona.

Član 26.

(Ugovor o radu sa sportistom)

- (1) Sportisti mogu provoditi sportske aktivnosti samostalno ili u okviru sportskih organizacija.
- (2) Aktivnost sportista iz prethodnog stava regulišu se ugovorom o radu.
- (3) Ugovor o radu iz prethodnog stava sadrži naročito: međusobna prava i obaveze, obavezu zdravstvenog i penzijsko-invalidskog osiguranja sportiste, rok angažovanja, visinu naknade za angažman, a može i visinu naknade za zaključenje ugovora.

Član 27.

(Obaveze sportiste)

Sportista je obavezan da se pridržava opštih i posebnih pravila koja su propisana ovim Zakonom, Zakonom o sportu u Bosni i Hercegovini, drugim zakonima, podzakonskim propisima i pravilima međunarodnih sportskih asocijacija i strukovnih sportskih organizacija koji vrijede za odnosni sport, a naročito:

- a) poštuje norme i pravila sportskog ponašanja,
- b) redovno trenira i učestvuje na takmičenjima,
- c) poštuje sportska pravila, službena lica i gledaoce,
- d) svojim ponašanjem čuva ugled sportskog kolektiva i sredine koju predstavlja,
- e) saraduje sa zdravstvenim službama i posebnim organima koji provjeravaju upotrebu nedozvoljenih stimulativnih sredstava.

Član 28.

(Prava sportiste)

Sportista ima pravo:

- a) da bude zaštićen od svake vrste duhovnog i fizičkog nasilja, ugrožavanja slobode, ljudskog i sportskog integriteta, zdravlja i sportskog dostojanstva,
- b) koristi sportske objekte i opremu, usluge stručnog rada i zdravstvene zaštite u skladu sa propisima,
- c) da na osnovu slobodno izražene volje učestvuje u reprezentativnim selekcijama,
- d) da se na osnovu slobodno izražene volje udružuje u sportski sindikat.

Član 29.

(Prava sportiste na zdravstveno i penziono-invalidsko osiguranje)

- (1) Klub u skladu sa zakonom i statutom, sportisti koji sportske aktivnosti ne provodi u vidu zanimanja obezbjeđuje prava na zdravstvenu zaštitu, ako ih ne ostvaruje po drugom osnovu, te opremu i rekvizite.
- (2) Klub, u skladu sa zakonom, obavezan je vrhunskom i zaslužnom sportisti, koji ne ostvaruje prava iz penziono-invalidskog osiguranja po drugom osnovu, uplaćivati doprinose za penziono-invalidsko osiguranje za vrijeme za koje se takmiči sa tim statusom.

Član 30.

(Prava i obaveze sportista stranih državljana)

- (1) U sportskim takmičenjima na području Kantona Sarajevo mogu učestvovati i strani državljeni.
- (2) Prava i obaveze sportista stranih državljana regulišu se ugovorom sa sportskim organizacijama u skladu sa međunarodnim sportskim pravilima.
- (3) Sportisti i sportski stručnjaci strani državljeni moraju imati dozvolu za rad od nadležnog državnog organa i registrovati se u skladu sa članom 42. Zakona o sportu u Bosni i Hercegovini.
- (4) Stranci koji na područje Kantona Sarajevo dolaze isključivo radi sudjelovanja u sportskim i

šahovskim priredbama izuzeti su od obaveze dobijanja radne dozvole u skladu sa Zakonom o kretanju i boravku stranaca.

- (5) Profesionalni sportisti ili sportski radnici koji na osnovu valjano zaključenog ugovora rade na području Kantona Sarajevo obavezni su prethodno pribaviti radne dozvole u skladu sa Zakonom o kretanju i boravku stranaca.

Član 31.

(Plaćanja naknade pri prelasku sportiste u drugi klub)

Obaveza plaćanja naknade pri prelasku sportiste prije isteka ugovora iz jednog kluba u drugi, te sankcije protiv kluba koji ne isplati naknadu regulišu se statutom odgovarajućeg sportskog saveza.

Član 32.

(Zabrana dopinga i obaveza provjere zdravstvene sposobnosti)

- (1) Sportistima i svim učesnicima u sportu zabranjeno je da uzimaju nedozvoljena stimulativna sredstva, da ih daju kao i da podstiču njihovo korišćenje u skladu sa pravilima Svjetske antidoping agencije (WADA).
- (2) Zabranjeno je sportistu izlagati sportskim aktivnostima, ako one mogu da ugroze ili pogoršaju njegovo zdravstveno stanje.
- (3) Sportisti koji učestvuju u pripremi za sportska takmičenja i u sportskim takmičenjima dužni su najmanje dvaput godišnje da se podvrgnu utvrđivanju opšte i posebne zdravstvene sposobnosti u skladu sa pravilnikom iz člana 45. stav (1) ovog zakona.
- (4) Sportisti, organizacije u sistemu sporta i nadležni zdravstveni radnici moraju poštovati pravila Evropske konvencije o antidoping kontroli i pravila Međunarodnog olimpijskog komiteta.

POGLAVLJE IV- STRUČNI KADAR

Član 33.

(Stručni kadar u sportu)

- (1) Stručni kadar u sportu mora ispunjavati slijedeće uslove:
 - a) imati visoku ili višu stručnu školsku spremu iz oblasti sporta i fizičkog vaspitanja, ili
 - b) imati visoku ili višu stručnu školsku spremu iz drugih oblasti i licencu za rad u oblasti sporta, ili
 - c) imati status vrhunskog sportiste sa diplomom za rad u oblasti sporta.
- (2) Stručnim radom u klubovima rukovodi stručni kadar iz stava (1) ovog člana.
- (3) Bliže uslove u vezi sa stručnom spremom stručnog kadra propisuje Ministar.

Član 34.

(Stručni poslovi u sportu)

Stručni poslovi u sportu u smislu ovog Zakona su:

- a) planiranje i realizovanje sportskih aktivnosti djece i omladine,
- b) planiranje i realizovanje sportske obuke,
- c) planiranje i treniranje sportista,
- d) obučavanje građana u sportskim znanjima i vještinama,
- e) planiranje i realizovanje sportske rekreacije građana,
- f) dijagnosticanje i provjera psihofizičkih i motoričkih sposobnosti učesnika,
- g) planiranje i izvođenje korektivne gimnastike,
- h) sprovođenje pravila u sportu,
- i) informatika u sportu,
- j) menadžment i marketing u sportu,

k) naučnoistraživačke djelatnosti.

Član 35.

(Ugovor o radu sa stručnim kadrom)

- (1) Klub zaključuje ugovor o radu sa stručnim kadrom u skladu sa zakonom.
- (2) Ugovor o radu sadrži naročito: međusobna prava i obaveze, obavezu zdravstvenog i penzijsko invalidskog osiguranja, rok angažovanja, visinu naknade za angažman, a može i visinu naknade za zaključenje ugovora.

Član 36.

(Licence odgovarajućeg sportskog saveza)

Sudije, delegati i sportski radnici su stručne osobe koje imaju licence odgovarajućeg sportskog saveza da obavljaju navedene aktivnosti u sportu.

POGLAVLJE V - SPORTSKI OBJEKTI

Član 37.

(Sportski objekti, u smislu ovog zakona)

- (1) Sportski objekti, u smislu ovog zakona, su izgrađeni ili prirodni objekti namjenjeni sportu koji ispunjavaju uslove za održavanje treninga, takmičenja ili druge sportske aktivnosti.
- (2) U zavisnosti od namjene sportski objekti moraju sadržavati odgovarajuće prateće prostore: sanitarne, garderobne, gledališne, servisne, spremišne i druge, a prema standardima propisanim od strane kantonalnih, federalnih, državnih, evropskih ili svjetskih sportskih asocijacija.
- (3) Pored pratećih sadržaja i odgovarajuće opreme, sportski objekat treba da bude pristupačan osobama sa invaliditetom.
- (4) Sportski objekti moraju ispunjavati propise međunarodnih sportskih organizacija, kao i standarde propisane odgovarajućim zakonima i drugim propisima.

Član 38.

(Sportski objekti u zavisnosti od značaja i namjene)

- (1) Sportski objekti u zavisnosti od značaja i namjene dijele se na:
 - a) objekte od značaja za općinu, odnosno Grad,
 - b) objekte od značaja za Kanton,
 - c) objekte od značaja za Državu.
- (2) Ministar donosi pravilnik o kategorizaciji i namjeni objekata od značaja za Kanton, Grad i općinu.

Član 39.

(Prava raspolaganja, upravljanja i korišćenja nad sportskim objektima)

- (1) Nad sportskim objektima koji su u vlasništvu Kantona pravo raspolaganja vrši Skupština Kantona.
- (2) Skupština Kantona može prenijeti na Grad ili općinu pravo upravljanja i korišćenja nad pojedinim objektom ili objektima iz prethodnog stava.
- (3) Skupština Kantona može posebnim aktom odrediti sportske objekte nad kojim prenosi prava upravljanja i korišćenja na Grad odnosno općinu ili organizaciju u sportu.
- (4) Kanton zadržava pravo nadzora nad vršenjem prenesenih prava iz prethodnog stava, te ukoliko utvrdi da Grad odnosno općina ne vrše prenesenu nadležnost na način određen aktom Skupštine Kantona iz prethodnog stava, može to pravo oduzeti.

Član 40.

(Prenošenje prava upravljanja sportskim objektima)

- (1) U vršenju prava raspolaganja, sportskim objektima, Skupština Kantona, Gradsko ili općinsko vijeće može prenijeti, na osnovu konkursa, pravo upravljanja i korišćenja nad tim objektima drugom pravnom ili fizičkom licu koje organizuje aktivnosti u sportu.
- (2) Pravo upravljanja i korišćenja prenosi se ugovorom, kojim se uređuju međusobna prava i obaveze, a naročito uslovi kojima se obezbjeđuje namjensko i racionalno korišćenje, čuvanje i održavanje sportskih objekata.

Član 41.

(Zabrana promjene namjene sportskog objekta)

- (1) Namjena sportskih objekata od značaja za Kanton, Grad i općinu ne može se mijenjati.
- (2) Izuzetno u slučaju da Skupština Kantona, Gradsko ili općinsko vijeće da saglasnost da se mijenja namjena sportskog objekta, Kanton, Grad odnosno općina je obavezna da obezbijedi objekat iste namjene.
- (3) Prostori u sastavu sportskih objekata i sportsko rekreacionih centara, koji ne služe osnovnoj namjeni, mogu se koristiti za privredne i druge poslovne svrhe.

Član 42.

(Bliži uslovi u vezi sa radom i održavanjem bazena)

Bliže uslove u vezi sa radom i održavanjem bazena utvrđuje ministar nadležan za sport pravilnikom o sigurnosti na uređenim kupalištima.

Član 43.

(Obaveza vlasnika i lica koje upravlja sportskim objektom)

Vlasnik, odnosno lice koje upravlja sportskim objektom obavezno je da obezbijedi njegovo korišćenje i održavanje u tehnički ispravnom stanju u skladu sa njihovom namjenom i posebnim propisima radi sigurnosti sportista, gledalaca i drugih učesnika u sportskoj manifestaciji.

POGLAVLJE VI - ZDRAVSTVENI NADZOR

Član 44.

(Obaveze kluba u okviru zdravstvene zaštite sportista)

Pod zdravstvenim nadzorom podrazumijeva se obaveza kluba na:

- a) provođenje preventivne zdravstvene zaštite svih registriranih sportista kroz kontrolne, periodične i ljekarske preglede,
- b) obezbijedenje zdravstvenog nadzora u toku priprema za takmičenje i takmičenja,
- c) osiguranje sportista od sportskih povreda,
- d) kontrolu uzimanja i davanja zabranjenih stimulativnih i doping sredstava sportistima.

Član 45.

(Pravilnik o zdravstvenom nadzoru i lista zabranjenih supstanci)

- (1) Pravilnik o zdravstvenom nadzoru iz prethodnog člana donosi Ministar koji rukovodi kantonalnim organom uprave nadležnim za poslove zdravstva
- (2) Kontrola uzimanja i davanja zabranjenih stimulativnih i doping sredstava sportistima vrši se na osnovu liste koju utvrđuje Medicinska komisija Međunarodnog olimpijskog komiteta ili odgovarajućeg međunarodnog sportskog saveza odnosno asocijacije.

POGLAVLJE VII - MATIČNE EVIDENCIJE

Član 46.

(Matične evidencije u sportu)

- (1) Ovim Zakonom se povjerava javno ovlaštenje vođenja matičnih evidencija o sportu na području Kantona Sportkom savezu Kantona Sarajevo i to:
 - a) organizacija u sportu,
 - b) sportskih objekata,
 - c) zaslužnih i vrhunskih sportista,
 - d) registrovanih sportista po granama sporta, posebno talenata,
 - e) stručnog kadra,
 - f) rezultata završenih takmičenja prema kalendaru za pojedine grane sporta,
 - g) stručne literature u sportu,
 - h) sportskih priredbi na području Kantona.
- (2) Vođenje evidencija, obrada podataka i informisanje u sportu vrši se u skladu sa ugovorom koji zaključuju Ministarstvo i Sportski savez Kantona Sarajevo.
- (3) Sadržaj i način vođenja evidencije iz st. (1) i (2) ovog člana propisuje Ministar.
- (4) Informacioni sistem Kantona Sarajevo zajedno sa Informacionim sistemom Bosne i Hercegovine i entiteta čini jedinstven sistem.

Član 47.

(Objedinjavanje i korištenje matičnih evidencija)

- (1) Evidencije iz prethodnog člana se skupljaju, objedinjavaju i koriste za potrebe Ministarstva i drugih korisnika u skladu sa propisima.
- (2) Zbirne godišnje evidencije iz prethodnog člana trajno se čuvaju u Ministarstvu.
- (3) Organizacije, privredna društva i ustanove u sportu obavezno vode evidenciju iz člana 46. stav (1) tač. b) - h) i o njoj dostavljaju podatke odgovarajućoj sportskoj instituciji.

POGLAVLJE VIII - JAVNI INTERES KANTONA, GRADA I OPĆINE U SPORTU

Član 48.

(Javni interesi u sportu Kantona, Grada i općina)

- (1) Javni interes Kantona u sportu je:
 - a) izgradnja, obnova i održavanje sportskih objekata od interesa za Kanton,
 - b) vrhunski sportski rezultat,
 - c) usavršavanje stručnog kadra,
 - d) razvojno-istraživačka i promotivna djelatnost,
 - e) međukantonalna, međuentitetska i međunarodna saradnja,
 - f) koordinacija ukupnih sportskih aktivnosti,
 - g) evidencija,
 - h) dodjela javnih priznanja i nagrada zaslužnim djelatnicima.
- (2) Javni interes Grada u sportu je:
 - a) izgradnja, obnova i održavanje sportskih objekata od interesa za Grad.
 - b) razvojni sport,
 - c) organizacija sportskih manifestacija masovnog karaktera,
 - d) sportski odgoj i obrazovanje u srednjim školama i fakultetima na području Kantona,
 - e) usavršavanje stručnog kadra,

- f) saradnja sa Olimpijskim gradovima,
 - g) evidencija za područje Grada.
- (3) Javni interes općine u sportu je:
- a) obnova i održavanje sportskih objekata od značaja za općinu,
 - b) organizovani sport za sve, posebno u funkciji zdravlja građana i kao preventiva devijantnom ponašanju,
 - c) razvojni sport sa opredjeljenjem na masovnost,
 - d) sportski odgoj i obrazovanje u predškolskim ustanovama i osnovnim školama, evidencija za područje općine.
- (4) Grad i općina će svojom odlukom utvrditi način provođenja javnog interesa Grada odnosno općine. Grad i općina mogu i druge aktivnosti utvrditi kao svoj javni interes, ukoliko obezbijede sredstva za njihovo ostvarivanje.

Član 49.

(Međusobna saradnja organa i službi nadležnih za sport)

- (1) Radi ostvarivanja javnih interesa iz prethodnog člana i drugih interesa sporta, organi i službe općina i Grada nadležni za organizovanje i praćenje sportske djelatnosti, obavezni su da sarađuju međusobno i sa nadležnim organima Kantona
- (2) Ministarstvo, između istaknutih sportista i sportskih stručnjaka sa područja Kantona Sarajevo, predlaže Ministarstvu kulture i sporta Federacije Bosne i Hercegovine najmanje jednog kandidata za imenovanje za člana Savjeta za sport Bosne i Hercegovine".

Član 50.

(Strategija razvoja sporta Kantona Sarajevo)

- (1) Da bi se ostvario javni interes i ciljevi u sportu Kantona Sarajevo, a u skladu sa Strategijom Bosne i Hercegovine, Zakonom o sportu u Bosni i Hercegovini, i podzakonskim propisima, donijete se Strategija razvoja sporta Kantona Sarajevo (u daljem tekstu: Strategija).
- (2) Strategiju donosi Skupština Kantona Sarajevo za najmanje četiri godine (olimpijski ciklus). Nacrt Strategije priprema Stručna Komisija koju imenuje Vlada Kantona na prijedlog Ministarstva.
- (3) Na osnovu Strategije Kantona Sarajevo donose se Programi razvoja sporta na području Kantona Sarajevo.

Član 51.

(Osnovna sadržina Strategije)

Strategijom se utvrđuju:

- a) osnovna polazišta i pravci razvoja,
- b) sadržaj i obim sportskih djelatnosti koji se finansiraju iz budžeta Kantona Sarajevo,
- c) razvojni i stručni zadaci u sportu,
- d) okvirni kriterijumi za vrednovanje programa i njihovog finansiranja u sportu,
- e) nosioci razvoja i mjere kontrole njihove realizacije.

POGLAVLJE IX - FINANSIRANJE SPORTA

Član 52.

(Finansiranje i sufinansiranje)

- (1) Sredstva za osnivanje i rad organizacija, privrednih društava i ustanova u sportu obezbjeđuje osnivač.

- (2) Javni interes u sportu Kantona Sarajevo ostvaruje se sufinansiranjem iz sredstava Budžeta Kantona Sarajevo na osnovu Strategije, dugoročnih i godišnjih programa razvoja sporta u Kantonu Sarajevo, te projekata kojim se ti programi realizuju.
- (3) Organizacije u sportu stiču sredstva i od članarine i drugih izvora utvrđenih zakonom.
- (4) Ustanove u sportu mogu sticati prihode i:
 - a) prodajom intelektualnih i materijalnih dobara i usluga,
 - b) iz prihoda po osnovu autorskih prava i patenata,
 - c) iz legata, poklona i zavještanja,
 - d) iz drugih izvora.

Član 53.

(Sredstva za zadovoljavanje javnog interesa)

- (1) Javna ustanova u sportu stiče sredstva za zadovoljavanje javnog interesa iz člana 48. ovog zakona, iz budžeta Kantona, Grada odnosno općine na osnovu pozitivnih rezultata ostvarenih u prethodnom periodu i godišnjeg programa rada koji donosi u skladu sa poslovima i zadacima utvrđenim ovim zakonom.
- (2) Sredstva za zadovoljavanje javnog interesa iz člana 48. ovog zakona, iz budžeta Kantona, Grada ili općine može sticati ustanova u oblasti sporta čiji je osnivač domaće pravno i fizičko lice, ako se na taj način obezbjeđuje racionalnije korišćenje sredstava i kvalitetnije obavljanje poslova i zadataka.
- (3) Međusobni odnosi Kantona, Grada ili općine i pravnih i fizičkih lica iz st. (1) i (2) ovog člana uređuju se ugovorom.

Član 54.

(Pravilnik o kriterijima za finansiranje javnog interesa u sportu)

- (1) Kanton, Grad, odnosno općina izdvajaju iz budžeta sredstva za finansiranje javnog interesa u skladu sa godišnjim programom rada i opredjeljenjima Skupštine Kantona, odnosno Gradskog ili općinskog vijeća.
- (2) Ministar donosi pravilnik o kriterijima za finansiranje javnog interesa iz stava (1) člana 48.
- (3) Gradonačelnik, odnosno općinski načelnik, donosi pravilnik o kriterijima za finansiranje javnog interesa iz stava (2), odnosno (3) člana 48.

Član 55.

(Program rada organizacije u sportu za narednu godinu)

Organizacije u sportu čijim programima se ostvaruje javni interes obavezno dostavljaju Ministarstvu, gradskoj, odnosno općinskoj službi nadležnoj za sport, svoj program rada za narednu godinu najkasnije do 30. oktobra tekuće godine.

Član 56.

(Izveštaj o radu korisnika budžeta)

- (1) Korisnici budžeta obavezno Ministarstvu, gradskoj odnosno općinskoj službi nadležnoj za sport dostavljaju redovan izvještaj o radu za prethodnu godinu najkasnije do 31. januara tekuće godine.
- (2) Korisnici budžetskih sredstava iz prethodnog stava obavezni su da na zahtjev Ministra, Gradonačelnika ili općinskog načelnika dostavljaju poseban izvještaj o radu u roku od 15 dana od njegovog traženja.
- (3) Ukoliko korisnik ne dostavi izvještaj iz st. (1) i (2) ovog člana ili ga ne dostavi u ostavljenom roku može se obustaviti dalje finansiranje njegovog programa.

POGLAVLJE X – NADZOR

ODJELJAK A. Nadzor nad zakonitošću rada

Član 57.

(Nadzor nad zakonitošću rada organizacija u sportu)

Nadzor nad zakonitošću rada organizacija u sportu, privrednih društava i ustanova u sportu, vrši Ministarstvo.

ODJELJAK B. Inspekcijski nadzor

Član 58.

(Inspekcijski nadzor u sportu)

- (1) Nadzor nad provođenjem odredbi ovog zakona i propisa donesenih za njegovo provođenje vrši Kantonalna uprava za inspekcijske poslove putem inspektora za sport (u daljem tekstu: inspektor).
- (2) Inspekcijski nadzor u smislu ovoga zakona obuhvata naročito:
 - a) postojanje propisanih opštih uslova za registraciju i djelovanje organizacija u sportu, privrednih društava i ustanova u sportu,
 - b) ispunjavanje uslova za obavljanje zadataka u sportu,
 - c) obavljanje sistematskih i zdravstvenih pregleda,
 - d) ispunjavanje propisanih određenih pravila za organizaciju takmičenja,
 - e) ostvarivanje prava sportista i stručnih kadrova i sportskih organizacija,
 - f) namjensku upotrebu novčanih sredstava,
 - g) upravljanje i namjensku upotrebu sportskih objekata,
 - h) vođenje propisane evidencije i dokumentacije,
 - i) donošenje upravnih mjera i kontrolu njihovog provođenja u skladu s posebnim zakonom kojim se uređuje kantonalna uprava.

Član 59.

(Posebni uslovi za inspektora za sport)

Za inspektora može biti postavljeno lice koje pored opštih uslova propisanih zakonom ispunjava i posebne uslove: završen fakultet sporta ili sportski smjer na drugoj visokoškolskoj ustanovi i tri godine radnog iskustva iz oblasti sporta.

Član 60.

(Rješenje inspektora za sport)

- (1) Inspektor u vršenju inspekcijskog nadzora izdaje rješenje radi otklanjanja povreda odredbi ovog zakona.
- (2) Protiv rješenja inspektora može se uložiti žalba Ministru u roku od osam dana od dana dostavljanja rješenja.
- (3) Žalba protiv rješenja iz prethodnog stava ne odlaže njegovo izvršenje.

Član 61.

(Obaveza omogućavanja obavljanja nadzora)

- (1) Organizacije, privredna društva i ustanove u sportu su obavezne da omoguće obavljanje nadzora u skladu sa čl. 57. i 58. ovog zakona.
- (2) Kantonalna uprava za inspekcijske poslove može pokrenuti postupak kod nadležnog suda za prekršaje protiv organizacije, privrednog društva i ustanove u sportu, kao i odgovornog lica ako onemogućava provođenje nadzora iz prethodnog stava.

POGLAVLJE XI - KAZNENE ODREDBE:

Član 62.

(Kazne za prekršaj organizacija u sportu i drugih pravnih lica)

Novčanom kaznom od 3.000 do 15.000 KM kaznit će se organizacija u sportu i drugo pravno lice ako:

- a) onemogući provođenje upravnog nadzora (član 61. ovog zakona),
 - b) ako ne utvrdi sistem sportskih takmičenja u skladu sa oblikom sportskih takmičenja na državnim, evropskim i svjetskim prvenstvima ili olimpijskim igrama (član 24. stav (1)),
 - c) organizuje aktivnosti u sportu bez odgovarajućeg stručnog kadra, sportskog objekta, planiranja i evidencije stručnog rada, vođenja matičnih evidencija (član 18., član 33., član 37. i član 47. stav (3)),
 - d) ne obezbjedi održavanje reda i zdravstveni nadzor za vrijeme trajanja sportskog takmičenja i priredbe (član 18. i član 45. stav (1)),
 - e) navede sportistu na upotrebu nedozvoljenih stimulativnih i doping sredstava (član 32. stav (1)),
 - f) izloži sportistu aktivnostima koje mogu da ugroze ili pogoršaju njegovo zdravstveno stanje (član 32. stav (2)),
 - g) zaključi sa licem koje ne ispunjava uslov stručne spreme ugovor o radu kao sa stručnim kadrom iz člana 23. (član 35.),
 - h) promjeni namjenu sportskog objekta ili njegovog dijela bez prethodne saglasnosti (član 41. stav (2)),
 - i) ne koristi i ne održava sportski objekat u tehnički ispravnom stanju u skladu sa namjenom i posebnim propisima, radi sigurnosti sportista, gledalaca i drugih učesnika u sportskoj manifestaciji (član 43.),
 - j) ne obezbijedi provođenje zdravstvenog nadzora (član 44.);
 - k) ne upiše se u matičnu evidenciju ili iz nje ne odjavi, ne dostavi izvještaje na način i u rokovima određenim ovim zakonom (čl. 46., 47. stav (3) i član 56.),
- (2) Za prekršaj iz prethodnog stava kaznit će se i odgovorno lice u organizaciji u sportu i drugom pravnom licu novčanom kaznom od 600 do 3.000 KM.

Član 63.

(Novčane kazne za prekršaj pojedinaca)

Novčanom kaznom od 300 do 1.500 KM kaznit će se za prekršaj pojedinac ako:

- a) organizuje sportske priredbe i sportska takmičenja suprotno propisanim uslovima (član 18.),
- b) navede sportistu na upotrebu dopinga ili mu doping da (član 32. stav (1)),
- c) promjeni namjenu sportskog objekta ili njegovog djela bez prethodne saglasnosti (član 41. stav (2)),
- d) koristi sportski objekat suprotno namjeni i ne održava ga u propisanom stanju (član 43.).

POGLAVLJE XII - PRELAZNE I ZAVRŠNE ODREDBE

Član 64.

(Obaveza donošenja podzakonskiha akata)

- (1) Ministar će donijeti propis iz člana 42. ovog zakona u roku od šest mjeseci od dana njegovog stupanja na snagu.

- (2) Ministarstvo će donijeti propise iz člana 23. stav (3), člana 25. stav (5), člana 33. stav (3), člana 38. stav (2), člana 46. stav (3) i člana 54. stav (2) Zakona o sportu u roku od godinu dana od dana njegovog stupanja na snagu.
- (3) Vlada Kantona imenovaće u roku od 30 dana od dana stupanja na snagu ovog zakona, Stručnu komisiju za pripremu Strategije razvoja sporta Kantona Sarajevo.
- (4) Stručna komisija iz stava (2) ovog člana pripremiće Nacrt Strategije u roku od tri mjeseca od dana njenog imenovanja.

Član 65.

(Obaveze Gradonačelnika odnosno općinskih načelnika)

Gradonačelnik, odnosno općinski načelnik donosi pravilnik iz člana 54. stav (3) ovog zakona, u roku od šest mjeseci od dana stupanja na snagu ovog zakona.

Član 66.

(Kontinuitet podzakonskih propisa)

Do donošenja propisa iz člana 18 stav (3), člana 20. stav (5), člana 25 stav (3), člana 29. stav (2), 33. stav (3), člana 36 stav (3), člana 42 stav (2) i člana 45. stav (1) ovog zakona primjenjivat će se:

1. Pravilnik o bližim uslovima za organizovanje sportskih priredbi na području Kantona Sarajevo ("Službene novine Kantona Sarajevo", broj 23/03) iz člana 18. stav (3) Zakona,
2. Pravilnik o kategorizaciji sportista prema ostvarenim rezultatima ("Službene novine Kantona Sarajevo", broj 1/22) iz člana 20 stav (5) Zakona,
3. Pravilnik o bližim uslovima stručne spreme stručnog kadra u sportu ("Službene novine Kantona Sarajevo", broj 23/03) iz člana 25 stav (3) Zakona,
4. Pravilnik o kategorizaciji i namjeni sportskih objekata na području Kantona Sarajevo ("Službene novine Kantona Sarajevo", broj 23/03), iz člana 29. stav (2) Zakona,
5. Pravilnik o zdravstvenom nadzoru sportista na području Kantona Sarajevo ("Službene novine Kantona Sarajevo", broj 23/03) iz člana 35 stav (1) Zakona,
6. Pravilnik o sadržaju i načinu vođenja matičnih evidencija u sportu ("Službene novine Kantona Sarajevo", broj 23/03) iz člana 36. stav (3) Zakona,
7. Pravilnik o kriterijima za podršku finansiranju javnog interesa u sportu Kantona Sarajevo ("Službene novine Kantona Sarajevo", broj 8/22) iz člana 42 stav (2) Zakona.
8. Pravilnik o kriterijima za sufinansiranje troškova treninga za seniorske ekipe premijerligaških klubova Kantona Sarajevo u ekipnim sportovima ("Službene novine Kantona Sarajevo", broj 27/20) iz člana 54. stav (2) Zakona.

Član 67.

(Obaveze lica koja nemaju stručnu spremu propisanu ovim Zakonom)

- (1) Lica zatečena na poslovima trenera i drugih stručnih kadrova u organizacijama u sportu koja ne ispunjavaju uslove stručne spreme za samostalno rukovođenje stručnim radom iz člana 33. stav (3) obavezna su steći odgovarajući stepen stručne spreme u roku od četiri godine od dana stupanja na snagu ovoga zakona.
- (2) Ukoliko lice iz stava (1) ovoga člana ne ispuni u roku od četiri godine uslov u pogledu odgovarajućeg stepena stručne spreme prestaje mu radni odnos, odnosno ne može biti angažovano na poslovima stručnog kadra u sportu.

Član 68.

(Obaveze zatečenih pravnih lica u sportu)

Postojeće organizacije u sportu, privredna društva i ustanove koja djeluju u oblasti sporta dužna su uskladiti svoja akta sa ovim zakonom, u roku od 90 dana od donošenja propisa iz čl. 64. i 65. ovog zakona.

Član 69.

(Ravnopravnost spolova i ujednačavanje terminologije)

Sve imenice upotrijebljene u ovom zakonu samo u muškom ili samo u ženskom rodu, odnose se na oba spola.

Član 70.

(Primjena Zakona o sportu u Bosni i Hercegovini)

Na sva ostala pitanja koja nisu uređena ovim zakonom primjenjuje se Zakon o sportu u Bosni i Hercegovini.

Član 71.

(Prestanak primjene Zakona)

Danom stupanja na snagu ovog zakona prestaje da važi Zakon o sportu Kantona Sarajevo ("Službene nvine Kantona Sarajevo", broj 45/12- .Prečišćeni tekst i 36/21).